

每週經課朗誦經文(巴克禮漢羅/教羅)2013/10/13

共同經課 - 1 耶利米書二十九章一節，四節～七節

1 先知耶利米 tùi 耶路撒冷寄 phoe hō 受掠 iáu tī-teh-ê ê 老大，kap chiah-ê 祭司、先知、眾百姓，就是 Nī-pò-kah-nī-sat tùi 耶路撒冷掠到巴比倫 ê。4 phoe 內講：萬軍 ê 耶和華，以色列 ê 上帝，tùi 一切受掠去 ê，就是我 hō in tùi 耶路撒冷受掠到巴比倫 ê 人，án-ni 講，5 Lín tiòh 起厝來 khiā 起；作園來食伊 ê 果子；6 娶 bó 來生 kiáⁿ，cha-bó-kiáⁿ；kā lín ê kiáⁿ 娶 bó；hō lín ê cha-bó-kiáⁿ 出嫁；hō in 生 kiáⁿ，cha-bó-kiáⁿ；thang tī-hia 加添 choē-choē，無減少。7 我所 hō lín 受掠去 hit-ê 城，lín tiòh 圖謀伊 ê 平安，替伊祈禱耶和華；因為伊得 tiòh 平安，lín 亦 tè 伊平安。

共同經課 - 2 詩篇六十六篇一節～十二節

1 Chit 篇詩歌，交 hō 樂官。1) 全地 lóng tiòh tùi 上帝來出歡喜 ê 聲；2 唱歌 o-ló 伊 ê 名 ê 榮光；用 o-ló ê 話來顯明伊 ê 榮光。3 Tiòh 對上帝講，你 ê 所做到 hiah thang 驚！因為你 ê 大權能，你 ê 對敵 beh 降服你。4 全地 beh 敬拜你，吟詩 o-ló 你；Beh 吟詩 o-ló 你 ê 名。[Sè-láh] 5 Lín tiòh 來，來看上帝所行 ê 事，伊對世間人所做 ê，不止 thang 驚。6 伊將海變做乾地；In 步行過河；Tī-hia 阮因為伊來歡喜。7 伊用伊 ê 權治理，直到永遠；伊 ê 目矚監察列邦；悖逆 ê 人 m̄ thang 自高。[Sè-láh] 8 萬百姓 ah，lín tiòh o-ló 阮 ê 上帝；Hō 人聽見 o-ló 伊 ê 聲。9 伊 hō 阮 ê 性命活 teh；亦無 hō 阮 ê 腳搖動。10 上帝 ah，你 bat 試驗阮；鍛鍊阮親像鍛鍊銀一樣。11 你 hō 阮入羅網；用重擔 hē tī 阮 ê 身上。12 你 hō 人坐車，poāⁿ 過阮 ê 頭殼；阮經過水火。總是你 hō 阮到富有 ê 所在。

共同經課 - 3 提摩太後書二章八節～十五節

8 你 tiòh 記得 tùi 大衛 ê 後裔所出 ê 耶穌基督，伊 tùi 死人中 koh 活，tú-tú 照我 ê 福音；9 我為 tiòh chit-ê 受苦，甚至受縛，親像行 pháíⁿ ê 人一樣；總是上帝 ê 道理無受縛。10 所以我因為受揀 ê 人來吞忍一切 ê 事，hō in 也有份 tī 基督耶穌 ê 拯救，kap 永世代 ê 榮光。11 有一句 thang 信 ê 話，就是講，咱若 kap 伊同死，也 beh kap 伊同活；12 咱若吞忍，也 beh kap 伊 saⁿ-kap 做王；咱若 m̄ 認伊，伊也 beh m̄ 認咱；13 咱若失信，伊猶原是信實，因為伊 boē 會背家己。14 你 tiòh 將 chiah-ê tāi-chi hō 人記得，也 tī 主 ê 面前吩咐 in m̄-thang 因為言語來相 chìⁿ；這是無利益，koh 會敗壞聽 ê 人。15 你 tiòh 致意 hō 上帝看你做可取 ê，做免見笑 ê 做工人，照正意來開拆真理 ê 道。

共同經課 - 4 路加福音十七章十一節～十九節

11 耶穌去耶路撒冷 ê 時，tùi 撒馬利亞 kap 加利利交界經過。12 入一個鄉社 ê 時，有十個 thài-ko ê tú-tiòh 伊，遠遠 teh khiā，13 出聲講，耶穌先生，憐憫阮。14 耶穌看見，kā in 講，lín 去將本身 hō 祭司驗。In 去 ê 時就得 tiòh 清氣。15 其中一人看見家己已經好，就 tò-tng 來大聲 o-ló 上帝，16 仆落 tī 耶穌 ê 腳前，來感謝伊；chit 人是撒馬利亞人。17 耶穌應講，十人 kiám 無 lóng 得 tiòh 清氣 mah？hit 九個 tī tá-lòh？18 Chit-ê 別族 ê 人以外，iáu 無別人 tò-tng 來歸榮光上帝 mah？19 就 kā hit 人講，起來，做你去，你 ê 信有救你。